

# 復刊辭

王雲五

本誌爲本館印行各種定期刊物之一。民元前十一年（公元一九〇一年，清光緒二十七年）本館始刊外交雜誌。民元前八年（公元一九〇四年，清光緒三十年）續刊本誌。至民元前二年（公元一九一〇年，清宣統二年）外交雜誌停刊，併入本誌。故本誌自創始迄今，歷四十有二年，實爲國內創刊最早而又廢續最久之刊物。近年迭遭國難，中斷至再。三。然皆隨本館印刷力之恢復，旋告復刊。第一次因一八事變而停頓，同年八月本館復業，本誌不久亦復刊。第二次因八一三事變暫停，改在長沙復刊，嗣以長沙大火，工廠被燬，移香港續刊，旋兼印重慶版。第三次則因太平洋戰事爆發，本館香港工廠全部爲敵人掠奪，重慶工廠又有待整理與擴充，本誌遂遭第三次之停頓。謹本復興奮鬪之夙志，不因再三打擊而稍懈，除自三十一年三月在渝繼續出版新書外，茲於本年三月恢復本誌之刊行。此卽本誌第三次復刊之經過也。

本誌以闡明學術爲主旨，所刊各文，見解力求客觀，議論務期平允。注重新知之介紹，然力避武斷，期無悖研究之精神。內容則人文自然，中外新舊，兼收並錄。然由於沿革關係，取材以涉及國際問題者爲多。按其性質，以類相從，冠以國際問題，從向例也。殿以文藝，依通例也。其他則略仿圖書分類，序其先後，期便讀者。

本誌第三次復刊，值世界空前大戰結束有期，國際永久和平曙光在望，同時我國國際地位已躋平等，國內學術與國民知識，亦視前有進。刊物之品質，乃隨一國之學術與其國民知識之進展而進展者，至其作用，亦視當前重大問題爲轉移。當茲重要關鍵，本誌所負使命特重。惟是同人學識譾陋，倉卒復刊，一切有同草創，扶掖指導，固有賴於當世賢達，而名言讜論，光我篇幅，尤爲不斷之請求也。